

Kontuola

ANTZUOLA / Egubakoitza / 2004ko maiatzaren 28a / 203. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

Gazte mailako taldeak Gipuzkoako kopa irabazi du, Amara Berri taldeari irabazita

AINTZANE IRIZAR

Zapatu arratsaldean jokatu zuten kopako finala gazte mailako futbol taldeko mutilak. Beasainen izan zuten partidua, Amara Berri taldearen aurka; 2 eta 1 gailendu ziren antzuolarrak. Herritar mordoia izan zuten animatzen.

Zapatu iluntzean kopa eta guzti azaldu ziren Antzuolan gazte mailako futbol taldeko mutilak. Giroa ezin hobea zen. Ez zen gutxiagorako; izan ere, gazteen bigarren mailako Gipuzkoako kopa ekarri zuten etxera. 2 eta 1 irabazi zion Antzuolak Amara Berriri.

Andres Arbulu entrenatzaileak azaldu digunez, asko sufritu eta gero lortu zuten garaipena. Ondo hasi zuten partidua; laugarren minutuan sartu zuen lehenengo gola Aitor Godoyk. Handik gutxira, min hartu zuen, baina, jokatzeko jarraitu behar izan zuen, taldekide bat baino gehiago zegoen eta min hartuta.

Bigarren zatiko hogeita hamabosgarren minutuan Amara Berri berdintzea lortu zuen. Antzuolarrak, baina, ez zuten etsi, eta partidua amaitzeko bi minutu besterik geratzen ez zirenean, Aitor Godoyk berak sartu zuen Antzuolaren bigarren gola, partidua irabazteko balio izan zien gola, hain zuzen ere.



Ligan eskas ibili ziren, baina kopan bikain ibili dira gazte mailako jokalariek.

Honako hauek osatu dute aurtengo denboraldian gazte mailako futbol taldea: Aitor Godoy, Eneko Mujika, Ekaitz Olalde, Imanol Lizarralde, Luis Franco, Auritz Guridi, Ibon Urzelai, Iñaki Arbulu, Mikel Idiakez, Txomin Alberdi, Unai Madariaga, Josu Asensio, Ander Cabrera eta Mikel Irizar bergararrak.

*Alebin mailako
futbol taldeak
Gipuzkoako
Txapelketako finala
jokatuko du*

KOPAN, BIKAIN IBILI DIRA

Denboraldia ez zuten batere ondo hasi antzuolarrak. Liga eskasa egin zuten. Urtarrilean amaitu zuten liga, eta euren taldean, azkeneko postuan geratu ziren. Jokatu zituzten hamabi partiduetatik zazpi galdu zituzten, bi berdindu eta hiru besterik ez zituzten irabazi. Guztira, 20 gol sartu zituz-

ten eta 29 gol jaso.

Gauzak horrela, ez zuten igorera faserako sailkatzeko aukerarik izan, eta kopa jokatu behar izan dute aurten.

Kopa jokatzeko hasi orduko, zeharo aldatu ziren gauzak gazteendako. Azkeneko hilabeteetan guztiz aldatu zaizkie gauzak antzuolarrak. Jokatu dituzten hamabi partiduetatik bederatzire irabazi dituzte kopan, bi galdu eta bat berdindu dute. Hona hemen beste datu bat, ligako eta kopako partiduen arteko aldea ikusteko: kopan, 45 gol sartu dituzte antzuolarrak, eta 16 besterik ez dituzte jaso.

ALEBINAK GIPUZKOAKO FINALERA

Gipuzkoako Txapelketako finalerako sailkatu da Antzuolako alebin mailako futbol taldea. Eskola arteko txapelketa jokatzeko dute alebinek.

Zapatuan, Estalan jokatu zuten finalerdiko partidua Iraurgi taldearen aurka; 4 eta 3 irabazi zuten antzuolarrak. Oso partidu parekatua eta lehiatsua izan zen, baina, azkenean, euren nagusitasuna erakusteko aukera izan zuten etxekoek.

Oraingo asteburuan jokatuko dute finaleko partidua antzuolarrak. Irabazten badute, herriko bi talde izango ditugu Gipuzkoako txapelaldian, gazteak eta alebinak alegia.

AISSIALDIA

Gaztetxoendako Errekaldeko lokala zabaldu dute

AINTZANE IRIZAR

Aurreko asteko zapatuan zabaldu zituen ateak Errekaldeko gaztetxoendako lokalak. Zapatu eta domeketan egongo da zabalik, eta nahi duten gaztetxo guztiak erabili ahal izango dute lokala. Neska-mutikoen oporrak hartzen dituztenean, berriz, egubakoitz gauetan ere zabalduko dute.

Aurreko asteburutik zabalik dago gaztetxoendako lokala, Errekalde auzoan.

Gaztetxoek oporrak hartzen dituzten bitartean, zapatu eta domeketan egongo da zabalik lokal hori: zapatuetan, 16:00etatik 20:00etara eta 21:00etatik 23:00etara; domeketan, berriz, 16:00etatik 21:00etara.

Oporrak hartzen dituztenean, berriz, egubakoitz gauetan ere zabalik izango dute lokala neska-

mutikoen: 21:00etatik 23:00etara egongo da zabalik, hain zuzen ere.

NEURKETAK EGITEN

Udaleko arduradunek azaldu digutenez, egunotan zarataren neurketak egitekoak dira teknikariak. Ordura arte, eta neurketaren emaitzak ezagutu arte, gauzez itxita egongo da. Hortaz, zapatu eta domeka arratsaldetan bakarrik zabalduko dute.

HIRU BEGIRALE EGONGO DIRA

Hiru begiralek jardungo dute gaztetxoekin lanean; Goretti Fernandez antzuolarra izango da lokalaren eta jardueren koordinatzailea. Beste bi begiraleak Maider, bergararra, eta Maria, azpeitiarra, izango dira.

Hainbat ekintza egiteko aukera izango dute gaztetxoek Errekaldean. Begiraleak eurei laguntzeko egongo dira, baina, helburua da gaztetxoek eurek izatea

gauzak antolatzeko ekimena.

Hilabete askotako lanaren emaitza da orain gaztetxoek Errekaldeko lokala izatea. Txatxilipurdik gaztetxoaren beharren gaineko ikerketa egin zuenetik, hainbat batzar egin dituzte Udaleko arduradunek gazteekin.

Horrela, hainbat baldintza eta arau adostu ondoren jarri die Udalak lokala. Hemendik aurrera egoteko eta aisialdirako toki bat izango dute gaztetxoek.

KIROLA

Garitanok seigarren egin zuen Aizkorriko maratoian eta Baleztana Lanzaroten egon da

AINTZANE IRIZAR

Bi antzuolarrek parte hartu zuten aurreko domekan, Zegama-Aizkorri mendi maratoian. Julen Garitano bikain ibili zen eta seigarren egin zuen. Igor Labaien, berriz, 188. postuan sailkatu zen. Guztira, 333 lagunek hartu zuten parte maratoian.

Julen Garitanok lan bikaina egin zuen aurreko domekan Zegama-Aizkorri mendi maratoian. Sei garren postuan bukatu zuen proba; lau ordu, 21 minutu eta 58 segundo behar izan zituen lasterketa amaitzeko. Bera izan zen lasterketako hirugarren euskalduna. Zuhaitz Ezpeleta arrasatearrak bigarren egin zuen, Pelotti italiarraren atzetik; arrasatearra izan arren, ezaguna dugu Zuhaitz Antzuolan, Goizperren dihardu eta lanean. Asier Urdanpilleta oñatiarra, berriz, bosgarren postuan sailkatu zen.

Julenendako lehenengo aldia zen Zegama-Aizkorri mendi maratoian parte hartzen zuena. Esan digunez, gainera, azkeneko

aldia izan da; ez du berriro parte hartzeko asmorik. Aurrerantzean kirola beste era batera bizi nahi du: lasaiago. Gogor entrenatu da Julen Aizkorriko lasterketa prestatzeko, eta pozik dago lortutako emaitzarekin.

Beste antzuolar batek ere hartu zuen parte maratoian, Igor Labaienek, hain justu. 188. postuan sailkatu zen (06:08:33).

BALEZTENA, 'IRONMAN' LASTERKETAN
Karlos Baleztana antzuolarra, bestalde, Lanzaroteko ironman lasterketan parte hartu zuen aurreko asteko zapatuan. Kontatu digunez, ez zen oso ondo ibili; izan ere, azkenaldian ezin izan da behar bezala entrenatu.

Igerian 3,8 kilometro, bizikletan 180 kilometro eta maratoia egin behar izan zituzten. Karlosek 12 ordu eta 25 minutu behar izan zituen lasterketa amaitzeko.

Eskarmentu handikoa da Karlos era honetako probetan; dagoeneko zortzi ironman probatan hartu du parte: Lanzaroten hiru aldiz, bi aldiz Alemanian, Austrian beste behin, baita Danimarkan eta Holandan ere.



Julen Garitano, Aizkorriko maratoian.

ASTELEHENEN GOIENKARIA

LABUR

Kirolariendako dirulaguntzak emango ditu udalak

Kirol jarduerarekin lotutako mediku azterketak egiteko dirulaguntzak emango dizkie Udalak hala eskatzen duten herritarrei. Udalak era honetako laguntzak ematen dituen lehenengo aldia da.

Gehienez, urtean behin jaso ahal izango du herritar bakoitzak laguntza hori. Guztira, 25 euro emango dizkio Udalak kirolari bakoitzari. Eskaera egiteko, nahikoa da azterketaren ordainagiria udaletxean aurkeztea. Norbanakoek zein kirol elkartetako kideek eskatu ahal izango dituzte laguntzok.

Kapitain berria izango du alardeak aurtengo jaietan

Jose Angel Arbulu izango da aurrerantzean Mairuaren Alardeko eskopetariaren buru edo kapitain berria. Atzo, eguena, egitekoak ziren Mairuaren Alardearen Elkartearen aurkezpena, eta hantxe eman zuten berritasun horren berri.

Genaro Laskurainek 25 urtez egin du eskopetariaren buruaren papera Mairuaren Alardean, eta iaz aurreratu zuen alardea lagatzeko asmoa zuela.

Udako ikastaroetan izena emateko epea zabalik dago

Udalak udarako antolatutako ikastaroetan izena emateko epea zabalik dago ekainaren 8ra arte, martitzena.

Hainbat ikastaro antolatu dituzte gaztetxoendako, helduendako eta erretiratuendako. Gimnasia, aerobik eta step ikastaroak, orientazio ikastaroak, umeei masajeak ematen ikasteko ikastaroak... Ingeleseko udalekuetarako izena emateko epea, berriz, gaur, hilak 28, amaitu da.



Sukaldaritza ikastaroa hasi da

Martitzenean hasi zuten Idolaz euskara elkarteak antolatutako sukaldaritza ikastaroa, eta hiru egunez, hainbat plater goxo prestatzen ikasi dute. Dozena bat lagun ibili dira ikastaroan, eta Joseba Lamariano sukaldari antzuolarra izan dute irakasle. Lehenengo egunean hainbat entsalada prestatzen ikasi zuten; bigarrean, pastarekin egindako platerak, eta azkeneko egunean, buzana saltsan prestatu zuten. Majo afaldu zuten guztiek ikastaroen ondoren./A.I.



Juan Cruz

ARGAZKIAK

Ezkontza erreportaiak
Jaunartze erreportaiak
Momentuko argazkiak
Estudioko argazkiak

BITXITEGIA

Marrokineria
Erlojuak, Bitxiak
Opari gaiak

Herriko plaza 4. Tel.: 943 78 70 66. ANTZUOLA

AITZ-GARBI



taberna
jatetxea

Pintxoak eta
kazuelatxoak.
Bazkariak eta afariak

Kalebarren 15. Tf. 943 78 70 51
ANTZUOLA

LARREA

TABERNA

Kalebarren 17
ANTZUOLA

MUJIKA HARATEGIA



Berezitasunak:
Etxean hazitako
zekorrek eta oilaskoak

Kalebarren 1.
ANTZUOLA
Tf. 943 76 64 34